

Date – 04/09/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Mizoram sorkarin tuialhthei man atanga VAT chhiah lak a tihpun hnuah nimin atang khan rate thar hman tan a ni.
2. Central YMA chuan tunhnaia Social Mediaa Document hrang hrang siam thei ni a insawi chhui chhuak turin Aizawl Police Station ah FIR an thehlut.
3. Ralthuam tih changtlunna turin sawrkar laipui chuan cheng vaibelchhe nuai 1 sing li leh sang nga a pawm.
4. Prime Minister Narendra Modia chuan nizan khan Brunei-a Bandar Seri Begawan ah India palai High Commissioni thuthmun tur Chancery thar a hawng.

<><><>

TAXATION PRESS CONF

Mizoram sorkarin tuialhthei man atanga VAT chhiah lak a tihpun hnuah nimin atang khan rate thar hman tan a ni a.

Sorkar thuchhuah tarlan danin, diesel-a chhiah zaa 5.23 lak thin chu zaa 10-ah tihsan a ni a, petrol-a chhiah zaa 16.36 lak thin chu zaa 18-ah tihsan a ni a, petrol leh diesel-ah hian Social Infrastructure & Services Cess cheng 2 leh Road Maintenance Cess cheng 2 lak a ni bawk a ni. Chhiah pun anih hnuah hian Petrol pangngai cheng 93.93 chu cheng 99.24 ah a pung a, a to belh na chu cheng 5.31 a ni a, Diesel hi cheng 80.46 atang in cheng 88.02 ah a pung a, a to belh na chu cheng 7.74 a ni.

Taxation Minister Dr Vanlalthana chuan Petrol leh Diesel atanga VAT tihpun in nghawng a neih tur leh mipui ten harsatna an tawh theih tur thil tam tak ngaihtuah lawk a ti an ni a, Mizoram mipuite tana tha ber tur ngaihtuah chunga ti an ni tih sawiin sorkar dinhmun hrethiam chunga chhiah pun chu pawm thiam turin mipuite a ngen tih a sawi.

Nimina a pisa-a Press Conference ah he thu hi sawiin Dr Vanlalthana chuan Petrol leh Diesel atanga VAT tihpun hian, a man chu sang viau angin lang mah se kum 2 kal taa petrol leh diesel man aiin a la hniam zawk a ti a,

Tuialhthei man an pun chhan hi sawifiahin, kumin kum tir lamah Mizoram Resource Mobilisation Committee atangin Petrol leh Diesel man tisang tur leh November, 2021-a tihhniam a nih hmaa VAT rate hmanga chhiah la leh tura ngenna

chu Taxation Department in an dawng a, state dangin an tihsan ve tho avangin Petrol leh Diesel a chhiah tihsan tawp aiin mipui ten an hriathiam zawk theih nan Road Infrastructure Cess leh Social Infrastructure Service Cess hmanga tih san chhoh ni se tihsan rel a ti a, Mizoram tan chuan Petrol leh Diesel atanga Cess lak chu thil thar ni mah se state dangte chuan hming chi hrang hrang hmangin an la reng tawh zawk a ni a ti bawk.

Minister sawi danin Mizoram-a chengten chhiah an pek tam loh avangin VAT rate tihsan tawp aiin a hmanna tur awm saa chhiah tihpunna siam chu a felfai zawk a, mipuiten hrethiam hram turin an ngen a ti.

(CORR)

<><><>

PC PARTY - VAT

PC Party chuan mipuite phurrit chhawk zangkhaina lam ni loa Mipuite sum bawm rawk zawnga Mizoram sawrkar hmalakna tha an ti lo tih thuchhuah siamin an sawi a,

Petrol leh Diesel chhiah pun avanga tuialhthei man to chho chungchangah hian Taxation Dept hotute nimin khan an hmu tih sawiin a rang thei ang bera sút a nih theih nana sulsu turin Taxation deptt.hotute an ngen a ni.

Taxation Depp aiawhin Additional Commissioner Pu Lalthansanga an hmu a, kumin July thlaa Council Of Ministers Lungleia thukhawmte'n Diesel leh Petrol -a chhiah lakna tihpun tura thutlukna an siam chu tha an tih loh thu an sawi a ni.

(PR)

<><><>

RDIAC SURGERY

Mizoram Health & Family Welfare Department leh Sri. Ramachandra Medical Centre, Chennai thawhhona in mi 24 a thlawn a Lung zai sak tawh an ni.

National Health Mission, Health & Family Welfare Department kal tlangin kumin February thlaa Cardiac Camp ZMC a buatsaih kal zelah Lung lama harsatna nei zai ngai mi engemaw zat Chennai a Sri Ramachandra Medical Center-ah a thlawn veka zai tura ruahmanna siam a ni a. Batch hmasa ber chu March thla khan mi 18 hlawhtling takin zai an ni a, Batch 2-na mi 6 chu kumin August thla tir lam khan hlawhtling taka zai an ni leh a, nimin khan a Batch 3 na tur in mi 9 -Puitling 3 leh Naupang 6 zai tura tirhchhuah leh an ni..

(CORR)

<><><>

TOURISM

Tourism Minister Pi Lalrinpuii'n chuan hmarchhak state in tourism lama hma an sawn theih nan a bik taka tñpui an ngai tih a sawi.

He thu hi Shillong khawpuia North Eastern & Eastern States/ Union Territories Tourism Ministers Conference ah sawiin Mizoram Tourism Minister Pi Lalrinpuii chuan hmarchhak khawpuite inkalpawhna tha tak hmanga thlunzawm leh khualhip theih hmunhma tlawh tur neihte tihhmasawn a tulzia sawiin, Sawrkar laipui chu ruahmanna fel tak ngaiantuah sak turin a ngen a, Mizorama community based tourism kalpui tum dan tlangpuite tarlangin, thing leh mau, ram leilung hausakna leh mawina bakah hnam ziarangte vawng him chungin thalaite tana subsidy tha tak tak

kengtel Entrepreneurship Development Policy leh Programme-te ruahman sak turin Sawkar laipui hotute a ngen a ni.

Pi Lalrinpuii chuan he huna tel Khuallante leh Tourism Minister-te chu Mizoram rawn zin tur leh, Mizoram mawina leh khualzinte chunga kan thatnate, kan hnam nunzia leh tihdante rawn hmu ve tura sawmin, indaidannate thiata North East-ah Tourism hmanga danglamma thlen tum theuh turin a sawm nghal bawk.

He Conference hi Union Minister for Culture & Tourism Pu Gajendra Singh Sekhawat leh Union Minister of State for Tourism Pu Suresh Gopi te kaihruainain Vivanta, Shillong, Meghalaya-ah hman a ni a, he hunah hian Mizoram aiawhin Tourism Minister Pi Lalrinpuii bakah sawrkar mi pawimawh te an tel a ni.

(CORR)

<><><>

CYMA

Central YMA chuan tunhnaia Social Mediaa Document hrang hrang siam thei ni a insawi chhui chhuak turin Aizawl Police Station ah nimin khan FIR an thehlut.

Central YMA hruaitute chuan Sawrkar Department leh Sawrkarin a ruat ni lo, mimal anga Document siam thei ni a inchhal te an awm hi pawi a tiin a ngai thutak hle tih thuchhuah ah an tarlang a, mipui leh Sawrkar zahlohmaah an ngai tih sawiin ram leh hnam hmelma ni a ngaiin langsar taka sual ngaihzamna niin an ngai tih an sawi bawk.

Central YMA FIR hi President Pu Lalhmachhuana leh hruaitu dang ten Aizawl Police Station ah kalin an thehlut a, OC Pu Deepak Pathak in a lo dawng sawng a ni.

(CORR)

<><><>

KHAWZAWL

Khawzawl MZP chuan DIET Building sak tur tun hnaia Mizoram Sorkar in hnuh let a tum chungchangah a chhan hriat an phut tih an sawi.

Khawzawl Mizo Zirlai Pawl chuan thuchhuah siamin Khawzawl-a DIET Building sak tur tun hnaiah Mizoram Sorkar-in withdraw-a Cancel a tum tih thawm an hriat chu an lungawi lo hle tih an sawi a, Central atanga pawm tawh Mizoram Sorkar-in hnuh kir a tum chu MZP Headquarters Khawzawl chuan a chhan leh vang chiang taka hriat a phut thu an sawi.

Khawzawl MZP chuan Cancel tumna a awm chu Mizoram Sorkar chuan ngaihtuah nawn leh se an tih thu sawiin Khawzawl ah DIET building sak anih theih nan hma an lak zel tur thu an sawi.

(Lalsangpuii Khawzawl PTC)

<><><>

LAWNGLAI

Lawngtlai District Bungtlang South BDO Pu Gilbert Lalhlimpuia chuan Bungtlang South Higher Secondary School (Samagra) ah mahin inpe in zirtir hna a thawk.

Bungtlang South Higher Secondary School ah hian Arts Subject paruk, English, Political Science, Sociology, History, Education leh Mizo awmin, tun dinhmunah Zirtirtu pathum an awm mek a, BDO hian kar hmasa Zirtawpni khan Bungtlang South a School hrang hrangte tlawh kualin, Higher Secondary School ah Zirtirtu an indaihloh vangin Zirlai naupangte hmakhaw ngaiin a hunawl Office kai hma leh hun thawl a neih ah naupangte a zirtir thin niin kn corr chuan a sawi a ni.

Thudawn danin Bungtlang South Higher Secondary School ah hian Zirtirtu hmunruak pathum a awm mek a, hnawhkhah tumin Sorkar chuan hma a la reng a, Zirtirtu tura dah zingah harsatna hrang hrang neih vanga zawm talo an awm a, hna dang thawh duh zawk vang a zawmlo pawh a awm a, insiamrem ngai a la awm vangin Zirtirtu hmunruak hi la hnawhkhah ala ni lo a ni.

(Lalngheta Ralte PTC Lawngtlai)

<><><>

MNF PRESS CONF

Mizo National Front (MNF) Legal Board chuan Mizoram State Commission for Women Chairperson Pi Lalchhandami chu dan loa ruat a nih thu sawiin, bang turin an phut.

Nimin khan Aizawl Press Club-ah Thuthar Lakhawmtute kawmin, MNF Legal Board chuan MSCW Act 2004 hnuaia Dan siamah Chairperson atan kum 65 pel tawh chu ruat theih a nih loh thu chiang takin a inziak a, Sorkar document hrang hrang leh Kohhran record-ah Pi Lalchhandami hian Chairperson atana ruat a nih hian kum 68-na a hmang mek tawh tih chiang takin a lang a ni an ti a.

Hei bakah hian MSCW member 7 zinga 3 te chu an hun la tawplovin annahni pawhin banna an la thehlut lo chungin thlahlui August ni 28 khan notification luahlanin, member 7 an ruat hnan leh a ni an ti a, hetianga dan bawhchhia-a MSCW Chairperson ruat mai duh tawk loa, member dinglaite pawh midang ruat hnan an nihna hi a ruattu, ZPM Sorkar hian an hunbi tiam chhunga sut ve ve turin MNF Legal Board chuan a ngen an ti.

MNF Legal Board hian September ni 9 tlai dar 5 hmaa Pi Lalchhandami MSCW Chairperson atanga ban leh MCSW member ruatna notification sut an phut a; an beisei anga bawhzuina a awm loh chuan a tawp thlengin hma an lak tur thu an sawi.

(CORR)

<><><>

DEFENCE

Ralthuam tih changtlunna turin sawrkar laipui chuan cheng vaibelchhe nuai 1 sing li leh sang nga a pawm. Defence Minister Rajanth Singh-a kaihruai Defence Acquisition Council (DAC) chuan ralthuam lei thar tur chi 10 rawtna hi a pawm a. Heng zingah hian indonaa hman tur lirthei tha chi Future Ready Combat Vehicles, Air Defence Fire Control Radar, Dornier-228 aircraft, Next Generation Fast Patrol leh Offshore Patrol Vessel te an tel a ni.

(Newsonair)

<><><>

PM

Prime Minister Narendra Modia chuan nizan khan Brunei-a Bandar Seri Begawan ah India palai High Commissioni thuthmun tur Chancery thar a hawng.

Nimin chawhnu lam kahn Prime Minister Narendra Modia hian Brunei a thleng a. Bandar Seri Begawan-ah ropui taka lo lawm a ni a. Tun tumah hian PM Modia hian Brunei leh Singapore tlawh turin a zinchhuak a. Brunei-ah hian Crown Prince Haji Al-Muhtadee Billah chuan Brunei International Airport ah a lo hmuak a. Tun tum hi India Prime Minister-in Brunei a tlawh hmasak ber a ni.

PM Modia hian a zinchhuah hmaa thuchhuah a siamah Brunei leh Singapore a tlawh tur chuan India nena ram pahnihte thawhdunna a tih chak tur thu leh ASEAN ramte thlenga nghawng tha tak a neih a beisei thu a sawi a. Act East Policy leh Indo-Pacific Vision ah te heng ram pahnihte hi an paiwmawh hle a ti a. Brunei nena inlaichinna in kum 40 hmel a hmu tur chu lawmawm a tih thu sawiin lal chhungkuat nen inkawmna hun tha tak an neih a beisei thu a tarlang bawk a ni.

(Newsonair)

<><><>

CHHATISGARH

Chhatisgarh-a Dantewada leh Bijapur district inrinaah nimin khan Maoist hel pakua sipaiten an kaphlum. Security te hian an thudawn bawhzuiin helai hmunah hian maoist dapchhuah beihpui an thlak a. Central Reserve Police Force-DRPF leh District Reserve Guard-DRG te tirh niin Maoist te nen hian an inkap a. Maoist pakua kahlum niin ralthuam engemawzat man tel a ni bawk.

Hetihlai hian police ten Bijapur district chhungah Maoist mi leh sa 13 an man bawk a. Heng an mi mante hi pawikhawihna hrang hranga inhnamhnawih nia hriat a ni.

<><><>